

Naqqiut

Siunnersuut 20. maj 2019-imeersoq taarserpaa

(Erseqqissaateqarluni aqqqissuussaananermillu allannguilluni naqqiuteqartoqarpoq)

Nuummi sanaartornikkut akit qaffakkaluttuinnartut sulisartunik akunnattumillu isertitalinnut nammakkuminaasut pillugit apeqquteqaat allaavigalugu oqallinnissamik siunnersuut.

(Inatsisartuni ilaasorta, Doris J. Jensen, Siumut)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasorta Doris J. Jensen, Siumut, Nuummi sanaartornermi akit qaffakkaluttuinnartut peqqutaallutik, siunissami isertitakitsut akunnattumillu isertitalit inissianut attartortittakkanut nuussinnaanissamut ajornartitsisussat qanoq ililluni pinaveersaartinneqarsinnaanersut pillugu apeqquteqaat aallaavigalugu oqallinnissamik siunnersuuteqarneranut qutsavigaara.

Naalakkersuisuniit meeqqatta siunissami pitsaasunik atugassaqartinneqarnissaat qulakkeerniarlugu, inissianik inuiaqatigiinni inissisimaffinni tamani atorneqarsinnaasunik sanaartornissap pingaaruteqarnera isumaqatigaarput.

Taamaattumik Naalakkersuisut inissiat sanaartorneqartut qaffasissumik pitsaassuseqarlutik eqaatsumik ilusilernerqarsinnaanissaat, aammalu nutaalianik naleqquttunillu titartarneqarsimallutik inituutut misigisaqarfigilluarneqarsinnaanissaat eqqumaffisorujussuaat. Ilaatigut tamatuma nassatarisaanik najugaqartut ulluinnarni pisariaqartitaat, inissianik minnerusunik naleqqusunillu qulakkeeriffiginiarneqarlutik annertuumik eqqumaffigineqarput.

Tamatuma peqatigisaanik ineqarnermut akiliutit ingerlatsinermut aningaasartuutitut naleqqunnissaat pingaaruteqarpoq, taamaattumillu tamatumunnga aningaasartuutit minnerpaaffimminniitinneqarnissaat pingaaruteqarluni. Kiisalu atortut siviisuumik attartunissaat pitsaasumillu pisoqalinissaat siunnerfigineqarpoq. Atortut sapinngisamik najukkaneersuussapput aammalu najukkani suliffeqarfinit isumagineqarsinnaassallutik.

Sanaartornermut akit ineqarnermut akiliutinut, taamaalillutillu ilaqutariit ataasiakkaat angerlarsimaffimmini missingersuutaannut sunniuteqartarmata, sanaartukkani aningaasaqarnerup annertuumik eqqumaffigineqarnissaa tamanit soqutigisarineqarpoq. Sanaartornermi kvadratmeterimut akiusut qaffasinnerunerat ineqarnermut akiliutit qaffasinnerunerannik kinguneqartariaqanngilaq, akerlianilli piffissap siviisunerusup ingerlanerani ineqarnermut akiliutit appasinnerunissaanut, allanngorannginnerunissaanut imminullu akilersinnaanerunissaanut qulakkeerisinnaassallutik. Tamanna peqqutigalugu Ineqarnermut Attaveqaqatigiinnermullu Naalakkersuisoqarfiup inissianik attartuunik, naleqquttunik, nutaaliasunik aammalu attartussuseqarluartunik ineriartortitsinermini siunnersortit, illussanik titartaasartut ingeniørillu suleqatigisani qanittumik suleqatigai.

Namminersorlutik Oqartussat kommunillu inissiaataat, inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq aqputigalugu maleruagassiuunneqarput. Ineqarnermut akiliutit inissiat angissusai kvadratmeterinngorlugit naatsorsorneqartarput, taamaattumillu inissianik naammattunik angissusilinnik, najugaqartup pisariaqartitaanut naleqqussakkanik sanaartornissaq pingaaruteqarpoq. Taakku saniatigut ininut ataatsimoorussiffiusunut akileeqaataassutissanik aningaasartuuteqartoqartussaavoq.

Ineqarnermut akiliutit tamarmiusut uku tungavigalugit katitigaapput:

- ingerlatsinerneq akiliutit najugaqarfimmut tuttartut,
- aqutsinerneq akiliutit inissiatileqatigiiffimmut tuttartut aamma
- aningaasaatinut iluanaarutit piginnittumut tuttusarput.

Taakku saniatigut attartortup pilersuinerneq tunngasut akiligassarai, soorlu innaallagissamut, imermut kiassarnermullu aningaasartuutit.

Ilumik piginnittup ukiut tamaasa ineqarnermut akiliutissat aalajangertarpei, peqqussullu naapertorlugit taakku aalajangersarneqarneranni najugaqarfiup aningaasartuutini tamaasa matusinnaassavai, taakkunungalu inissiamik piginnittup aningaasaatinut iluanaarutissaannut aqutsinerneq akiliutinut aningaasartuutit ilaatinneqarput. Aningaasaatinut iluanaarutit illup sananeqarnerani akiusoq, illup sananeqarneranut atatillugu aningaasartuutit tamanik imaartoq tunngavigalugu naatsorsorneqartarput, taakkunungalu pilersaaruserneq, nakkutillineq sanaartorfissagissaanerlu ilaapput.

Apequteqaat aallaavigalugu oqallinnissamik siunnersuummi ineqarnermut akiliutit INI A/S-ip aamma Iserit akornanni assersuussinerit innersuussutigineqarput. Tassani illunik piginnittup assigiinngitsut marluk pineqarput, taamatullu illut immikkoortut assigiinngitsorujussuit marluk pineqarlutik, sananeqarnerisa ukiui assigiinngitsut, taamaalillunilu sananeqarnerannut akit assigiinngitsut. Illup pisoqaanerusup sananeqarnermini, illup nutaanerusup sananeqarnerani akiusumut qaffasinnerusumut naleqqiulluni akikinnerusinnaavoq.

Naalakkersuisut maannarpiat attartortitsisarnerneq inatsit nutaaq suliarileruttorpaat, suliaq Namminersorlutik Oqartussat inissiaataasa kommuninut tunniunneqarnerneq pillugu suleqatigiissitami ingerlanneqarpoq. Ineqarnermut akiliutinik aalajangersaaneq maleruagassiuussinerillu, kiisalu aningaasaatinut iluanaarutit taakkulu atornerqartarnerat pillugu aalajangersakkat sulianut taakkununga ilaatinneqarput.

Isumaginninnerneq Inatsisinillu Atuutsitsinerneq Naalakkersuisoqarfik suleqatigiissitamut suleqataavoq, taamaattumillu aamma ineqarnermut tapiissuteqartarnerneq aalajangersakkat, taakkunungalu nutarterinissamut pisariaqartitsinerusinnaasut annertuumik aallunneqarput. Tamanna aamma suleqatigiissitami innersuussutit ersiuteqassaaq. Suliami inuiaqatigiinni innuttaasut tamarmik inissianik naleqquttunik pissarsisinnaanissaasa qulakkeerneqarnerneq siunnerfigineqarpoq.

Naalakkersuisut sinnerlugit oqallilluarnissassinnik kissaappassi aammalu partiit isummersuutaasa tusarnissaannut qilanaarpunga.